

DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,

Orthodoxorum Medicorum Patrono.

BIU Santé  
Médecine  
Paris

QUÆSTIO MEDICA,

CARDINALITIIS DISPUTATIONIBUS

*manè discutienda in Scholis Medicorum, die Jovis quintâ*

*mensis Martii, anno Domini M. DCC. LXXXIX.*

M<sup>o</sup>. FRANCISCO - LUDOVICO THOMAS D'ONGLÉE,

Dectore Medico Præfide.

*An eò difficilior hygieines praxis, quò à naturæ legibus, homo remotior?*

I.

*IN sudore vultûs tui vesceris pane.* (Gen. cap. 3, v. 19.) Hæc est unica homi-  
ni, ad conservandam sanitatem à summo legislatore insita lex. Solis enim in  
fabulis, terra ex suâ sponte homini victum suppeditat; inculta sibi que derelicta,  
tantummodo spinas & tribulos germinat. (Ibid. v. 18.) Et quidem hominis in  
hocce mundo conditionem consideranti, statim quatuor occurrunt vitæ genera,  
quæ ipsum alere possunt: vita nempe pastoralis, agrorum cultura, piscatio,  
& venatio. Solis hisce in conditionibus suæ naturæ accommodatis, ex proprio la-  
bore homo sibi victum comparat, seu ut sacræ Scripturæ verbis utar, *in sudore*  
*vultûs sui vescitur pane.* Labor igitur sive corporis exercitium, prima est hygieines  
regula, ad quam veritatem demonstrandam, vel levissima sufficit, hominum  
contemplatio. Quanta enim differentia, laboriosum ruricolam inter & magnarum  
urbium divitem otiosum: is ab ortu solis ad occasum, in excolendâ terrâ insudat;  
certis horis certisque diebus, artus laboribus fessos, dulci recreat otio; suffi-  
cienti necessarioque victu, varia vitæ dispendia refarcit; huic itaque athleticum  
robur, huic illibatâ sanitate, ad summum senium pervenire datur: ille è contra  
inverso naturæ ordine, nocturnum tempus vigiliæ, diurnas horas, somno impen-  
dit; è lecto ad mensam omni cupidinarum genere oneratam accumbit; quandoque  
non ad vitandum tædium, sed ad ejus speciem mutandam, per urbis compita  
molliter in curriculo fertur. Ab eo vitæ genere, innumeri sobolescunt morbi,  
nullâ ferè medicamentorum arte superandi: ventriculus debilitatus functiones suas  
malignè exercet, chylus aseptus fit, ab exercitii defectu humores lentescunt,  
vasa obstruuntur; laxatæ fibræ musculares resolvuntur, artus denique sustinendo  
corpori, impares fiunt. His de causis ante statutum à naturâ tempus ad terram  
redit dives, in quâ suæ existentiae, nulla alia impressit vestigia. Quantum inter



2

se forte physicâ differant ruricola & dives otiosus, ex dictis satis abundanter patet: utriusque autem, fors moralis, majorem obtinet diversitatem, sed de eâ tacemus inviti, ne extra circumdatos nobis limites, divagare videamur.

## I I.

**V**IDIT Deus quæ fecerat, & erant valde bona. (Gen. cap. 1, v. 31.) Optima est mundi fabrica. Labor, corporisque exercitium, ut mox dictum est, naturalis est hominis conditio; peculiari organorum dispositione, ad laborem fuit à naturâ comparatus: perindè ac cœtera animalia, artuum usu donatur, si tamen quædam cursu eum superant, solus diuturniori itinèri, absque ullo sanitatis detrimento, sufficit; si quædam, manuum aliarum-ve partium dexteritate vigent, iis industriâ suâ, præstantior est; si quædam instinctu donantur, in dirigendis motibus idoneo, solus judicium habet, quo diversos corporis motus, combinare potest. Inde liquidò constat, hominem ad sibi victum comparandum, melius quàm cœtera animalia, à naturâ fuisse instructum. Si itaque animalia, quæ ab hominis imperio libera degunt, ad summum vitæ suæ terminum illasâ sanitate perveniunt, cur idem homini non contingeret? Cur tam rarò inter homines centenarios videmus, (vitam enim humanam Deus intrâ unius centuriæ angustos limites, conclusit)? Cur inter centum animalia, vix unum reperias, quod per totum vitæ suæ curriculum, semel ægotaverit, dùm verò in pari hominum número, vix unus sit, qui morborum expertus, feliciter ad senectutem perveniat? Illud quidem mihi pendere videtur, ex eo quod animalia, sancitis sibi à naturâ legibus, fideliter obsequantur, dum è contrâ homo, in sui-ipsius detrimentum vertit præstantissimum naturæ donum, rationem nempe, quâ à cœteris regni animalis entibus distinguitur.

## I I I.

**B**ONUM non est hominem esse solum. (Genes. cap. 2, v. 18.) Homini solo non tantum rationem & judicium, sed etiam loquelam natura concessit. Hæc tria, hominem ad societatem idoneum fecerunt, ad quam fuit destinatus, & sine quâ forsitan genus humanum, jamdudum è medio terræ sublatum fuisset. Mente enim concipi nequit, quomodo ab omni prorsus societate remota gens humana, non solum perennari, sed etiam in totam terram, se diffundere potuisset. Numerosior ea fieri non potuit, quin unâ quintum vitæ genus, oriretur. Industriam hic volo. Sed innumeri propè modi, quibus ea exerceri potest, pariter non consentiunt cum naturæ legibus, ad conservationem hominis. Is quippe sedentariis laboribus, victum sibi comparat: ille toto die, urente sole, pedibus, vel in equo, longum absolvit iter: crassum, mephiticum deleteriumque aërem, spirare cogitur alius; focus ardentibus quotidie affidet alter. Perferendis variis laboribus ab industriâ oriundis, corpus hominis promiscuè aptum, natura non efformavit. Quid in his centumque aliis circumstantiis, consilium quærenti, Medicus respondere poterit? Num ideo suam conditionem deferere, & ad aliam naturæ legibus magis consentaneam, confugere suadebit? Illud in nostris institutis, impossibile videtur. Aliundè qui consilium petit, sæpissimè nullo alio modo, rectius sibi victum comparare potest; cogitur itaque Medicus, ea tantum suadere, quæ minus damnofa esse sua sibi edocuit experientia, seu renascentia quotidie mala, medicamenti debellare. Sed ex eo quod vitam penitus contrâ naturæ leges degenti, integram sanitatem promittere Medicina non possit, absonum est inde colligere, incertam esse Medicinæ scientiam, imperfectumque esse præstantissimum Creatoris



opus. Suae sunt hìgieine constantes immutabilesque leges, quas ipsa natura sancivit: iis quippè inquirendis, totus in Paragrapho sequenti, incumbam.

# I V.

**Q**UÆDAM societatis vitia, ejus intima perlustrando, prioribus in articulis deteximus; nunc si ad eam generatim sumptam, animum convertamus, apparebit summa Creatoris perfectio, confirmabiturque propositio nostra, quã diximus singulos homines, ad societatis prosperitatem, simbolam suam conferre debere: è suã quippè societate, brevi inutilis rejiceretur *Castor*, *Apes*, *Thermita*, qui laboribus familiæ communibus, debitum, non præstaret auxilium. Itã quidem in societatis primordiis, fuisset de homine desidioſo; ab hominum confortio rejectus, brevi omnium rerum inopiã, ferarumque imprimis voracitate, inultus perisset. Labor igitur, illud est quod homo societati debet. Hæc perfectificat rerum humanarum, vel minimè doctus. Sub omni respectu hominem jam consideravimus, ad laborem fuisse destinatum, sanitatique necessarium esse laborem vidimus; exercitio enim & labore artus confirmantur, eorum cardinibus & juncturis, sua conservatur volubilitas. Comminuti humores, ab incrassatione arcentur, & ad destinatos fines, quam facillimè perveniunt. A labore excitatus appetitus, sufficit ad sumendam requisitam simplicissimi viãus copiam. Malignus est divitis otiosi appetitus, quem vix ex ultimis Indiis repetita aromata, fuscitent; rustico aratro reduci, tanta est in nigro & vetusto pane edendo voluptas, ut omnes Petroniorum delicias superet. Alimentorum qualitate non fatigatus, quantitate non obrutus ventriculus, naturæ tempus sinit necessarium, quo pleno placidoque somno, corpus reficere queat. Ejusmodi somnum, excipit alacris ad vigilias transitus. Laboriosum hominem, parum afficiunt intemperantiæ voluptates. Assiduus igitur corporis labor, secum sobrietatem importat, quam Medicorum Philosophorum constans observatio, alteram esse hìgieinẽ regulam ab ipsã naturã sancitam, edocuit.

Alia maximi momenti ad conservandam sanitatem, ex labore emergit utilitas; mentis videlicet quies. Liquet enim, ex assiduã corporis exercitatione, animi affectiones, nullas, vel saltem levissimas esse; tunc per metaphisices campos anima non spatitur, à subtilioribus quæſtionibus parum afficitur. Ruricolæ deridiculum videtur pro summo sibi negotio habere, num terra circã solem, ellipticos describat orbes, num aqua inter naturæ elementa, num verò tutius inter mixta, accenseri debeat: Regem suum diligit, scit quippè probè institutam societatem, moderatorem habere, sed Ministrorum nomen ignorat: sic Ecclesiæ suæ pastorem humanitate honestisque instructum moribus veneratur diligitque, sed de Episcopi nomine existentia ve, parum curat. Quid insuper ea ad ejus felicitatem? Existentiæ suæ subsistentiam, subsistentiæ laborem suum sufficere certus, ad ea quæ iis extranea esse censet, parum attendit. Assiduus itaque corporis labor, animi pathemata arcet, terentamque mentem efficit; quæ conditio, ad sanitatem, multum confert.

Ex his tribus, labore nempè, sobrietate, & animi tranquillitate, veluti ex fonte plenã dimanat sanitas, cum verò homini qui ejusmodi sanitate fruitur, nullum sit opus medicinæ consiliorum ad sanitatem conservandam, tota igitur hìgieines versatur in conservandã, vel in inclinatã sanitate erigendã hominis qui nullã ætatis temperamentique habitã ratione, animi sensuumque affectionibus, præjudicatis opinionibus plerumque absone obtemperatur, ut in sequenti paragrapho erit demonstrandum.



*Si vis incolumem, si vis te reddere sanum,  
 Curas tolle graves: irasce crede profanum,  
 Parce mero, canato parum, non sit tibi vanum  
 Surgere post epulas, somnum fuge meridianum,  
 Ne mictum retine, nec comprime fortiter animum.  
 Haec bene si serves, tu longo tempore vives.* (Schol. Salernit.)

**G**ENERALIORA inter *Salernitanorum* consilia, nulla (ut ex his paucis constat) reperias praecepta positiva, omnia verò negativa. Hujusce ratio, in promptu est; non enim ad hominem assiduo labore corpus exercentem, sed ad regem, id est ad hominem satiatum, & undèquaque circumcessum, ab omni generis voluptatum illecebris, quæ, una corpus & mentem demulcere possunt, spectabat. Homo quippè secundum simplices naturæ leges vitam degens, soloque rationis adjumento ductus, Medico non eget, ad suam sibi sanitatem conservandam. Aves enim consilium non petunt, num triticum, num milium, num eâ vel aliâ potiùs horâ, num in eâ vel aliâ potiùs quantitate cibum fument; instinctus iis sufficit. Pessima itaque foret hominis fors, si solus inter animantia, sua sibi ratio idem auxilium denegaret. Medicum igitur accersunt, ut eâdem semper servatâ victus ratione, integram tamen sanitatem conservare possint. Illud vitæ genus inhibet Medicus: sed inhibendo, consiliorum veritatis certos facere nequit. Et quomodònam persuadere posset, quandò ea ipsa quæ inhibet à sensuum affectionibus suadentur, undèquaque ab adstantibus, adulatoribus, agyrtis, aniculis prædicantur. Nec silentio omittendum est; si multi sunt indocti, qui suam in curandis morbis peritiam jactitant, multò quippè numerosiores ii sunt, qui naturæ legum ad animalium conservationem haud gnari, hygieines tamen praecepta, magistrali voce tradunt, quique de eâ Medicinæ parte, veris Medicis imperitiam quâ ipsi quibusdam in circumstantiis fatentur, ogganiunt. Et re ipsâ quid suadendum homini, qui adversante nativâ corporis temperie, cœlibem vitam degere cogitur? quid puellæ quæ primos amoris ignes persentit, cuique pater est avarus ambitiosusve, vel mater zelotipa superbave? quid homini qui in alienâ domo cibum sibi oblatum sumere cogitur, nec sibi congruum seligere potest? quid hominibus qui sedentariis laboribus victum sibi comparant? quid melancholicis, hypochondriacis, atrabiliariis hîcæ entibus, quibus mens ægotans in corpore sano? miseri! mentis sensuumque affectiones, coercere nesciunt. Quid..... nec sufficeret tempus, si omnes casus recensere vellem in quibus difficilis, ne dicam impossibilis est hygieines praxis. Singulis itaque in instantibus, a temporibus, locis, circumstantiis, à sensuum mentisque affectionibus, à præjudicatis opinionibus in hygieines praxi impeditus Medicus, ingemiscit & tacet.

*Ergò ed difficilior hygieines praxis, quò à naturæ legibus hono remotior.*

Proponebat Parisiis, FRANCISCUS-ANTONIUS-JACOBUS DUVAL, ex insulâ Borbonicâ, Saluberrimæ Facultatis Medicinæ Parisiensis Baccalaureus, Theses Auctor.

A. R. S. H. 1789. AB OCTAVA AD MERIDIEM.

Typis QUILLAV, Saluberrimæ Facultatis Medicinæ Typographi. 1789.